

N pìcol gran cher dàtol

I bec de la scolina de Sèn Jan i à regoet magnadiva per la mensa del puret de Trent e jeghes e material didatich per i bec de L'Abruzzo

Sèn Jan - Na dì n còcol de cousoi, na dì un de pomidores. Renunziar a valch per didar chi che à più de besegn. Chest l'é stat l'envit che le maestre de la scolina de Sèn Jan ge à sport a si pìcoi bec e a soe familie per la scomenzadiva "Un barattolo al giorno".

L'idea é vegnuda da na mama – ne à dit la maestra Lucia Soraperra – che cognosc personalmenter Padre Fabrizio Forti, responsàbol de la mensa del puret de Trent: perché pa endana la Careisema no renunzion a valch per ge l sporjer enveze a chi che stasc piec che noi?

Coscita ge aon domanà ai bec che na uta en setemana i porte valch da magnar per i purec che se ouc a la mensa de Trent. E dute le familie à responet con gran entusiasmi tant che te scolina de Sèn Jan l'é stat empienì scatologn e scatologn de roba.

En mèrcol passà te scolina l'era dut en moviment. I bec saea che fossa ruà personalmenter Padre Fabrizio a se tor la roba da portar a Trent: "Ve sporje dassen n gran developei – l'à dit – percheche aede pissà e lurà per chele persone che no à ne ciasa, ne let e nience nia da magnar. Ogne dì a la mensa del puret rua passa 150 persone a magnar e amò apede didon fora

ence passa 100 familie col ge enjignar ogne 15 dis na gran bolga con ite magnadiva. Per vosc gran cher ve die n gran gran developei." Duc i bec ensema dapò (te scolina de Sèn Jan i é de 105), co le maestre e ence valch genitor envià per l'ocajion, i ge à ciantà na bela ciantia de la Careisema a Padre Fabrizio che se à emozionà te i veder tant engaissé. Sporjer con cher dàtol a chi che à più de besegn l'é bel e emportant. E defat la solidarietà de chisc pìcoi bec no se à fermà chiò. La setemana

passada i à regoet n grum de jeghes e material didatich per i bec pìcoi de L'Abruzzo tocé dal teremot, che i perdù dut sot la majia. Chesta roba vegnarà data a na infermiera che jirà lajù a portar so didament e coscita l pont de solidarietà trat da la scolina de Sèn Jan se à slongia amò de più.

Basta pech per far contenc chi che dasc e chi che ciapa. L'é l'ensegnament più emportant che i à abù i pìcoi de la scolina de Sèn Jan. (mci)



Padre Fabrizio Forti te la scolina de Sèn Jan.